

Adresseføresegn for Aukra kommune, Møre og Romsdal fylke

§ 1: Heimelen til adresseføresegna er vedtak i kommunestyret i Aukra 29/3-2012 med heimel i lov av 2005 nr. 101 om eigedomsregistrering (matrikkellova) § 21, jf. forskrift 26. juni 2009 nr. 864 om eiendomsregistrering (matrikkelforskriften) § 59. lov av 18. mai 1990 nr. 11 om stadnavn.

§ 2: Mynde som gjeld adressering er lagt til eining Plan og utvikling. Den skal syte for at adresseringa vert løyst i samsvar med reglane i lov, føresegner og Statens Kartverk sin adresserettleiar. Teknisk avdeling skal så tidleg råd er sende kart med innteikna vegparsellar til Namneutvalet for namnesetting.

§ 3: Mynde som gjeld arbeid med namn vert lagt til Aukra kommune sitt Namneutval. Utvalet skal syte for å lage framlegg til val av adressenamn (vegnamn), og handsame framlegg før godkjenning i kommunestyret. Eining Plan og utvikling skal vera sekretariat for Namneutvalet. Namneutvalet skal sjå til at namna vert lagt fram for Namne- konsulenttenesta ved NTNU i Trondheim til godkjenning.

§ 4: Aukra kommune skal ha ein adresseplan for heile kommunen. Den skal femne om alle vegar som er opne for allmenn ferdsel. Den skal og vise adresseringa i til dømes hytteområde utan køyrbar atkomst. Adresseplanen skal vise oppdeling av vegnettet i adresseparsellar både offentleg og privat eigde. Alle bustadeigedomar, verksemdar og offentlege institusjonar og hytter skal så langt det er råd ha vegadresse.

§ 5: For adressenummer (husnummer) kan ein etter forholda på staden velge mellom kantsystemet eller avstandssystemet. Ved bruk av avstandssystemet er adressenummeret talet på 10- metrar frå starten av vegen.

§ 6: Adressenummeret skal ha partal på høgre side av vegen og oddetal på venstre side, anten det er kantsystemet (det tradisjonelle) eller avstandssystemet som vert nytta.

§ 7: Oppsetting av adressenamnskilt (vegnamnskilt): For riks- og fylkesvegar Statens vegvesen. For kommunale vegar og andre vegar som er opne for allmenn ferdsel skal kommunen syte for skilting.

§ 8: Oppsetting av adressenummerskilt: Eigar av eigedom som har fått brev frå kommunen om tildelt adresse skal syte for å skaffe og sette opp adressenummerskiltet, og syte for at skiltet er godt leseleg frå den vegen eigedomen har adresse til. Vert adressenummerskilt ikkje sett opp innan eit år, kan kommunen sette det opp for eigaren si rekning. For nybygg skal adressenummerskilt vere sett opp før bruksløyve vert gjeve.

§ 9: Kommunen rår til at det vert nytta standard adressenummerskilt. Desse er 15 cm høge, med kvit eller lys botn og svart bord langs kanten. Tala (og muleg bokstav) skal vere 10 cm høge. Strekbredde 1 cm. Om ein nyttar anna type skilt må ein sjå til at desse er like gode som standardskilta, og like varige.

§ 10: Skilta bør settast opp på høgre sida av inngangsdør om mogeleg. Plassering ca 2,5 m over bakken kan vere ein hovudregel. Når avstanden mellom vegen og bygning med adresse for lang til å lese skiltet, må det settes opp på stolpe ved vegen.

§ 11: Om namning av vegar. At namnesak startar, skal kunngjerast i lokalavis og på kommunens heimeside på nettet med oppmoding om å kome med råd om namn.

§ 12: Denne føresegna tek til å gjelde så snart den er godkjent av Aukra kommunestyre.